



**Sumáriu Kazu
Tribunál Distritál Oekusi
Janeiru 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 13

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika (VD) no tipu ilísitu sira kona-ba violénsia doméstika.	12
Artigu 145 KP	Ofensa ba integridade fízika simples	1
Totál		13

2. Totál desizaun ne'ebé JSMP monitoriza : 13

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	10
Admoestasaun	Artigu 82 KP	2
Omologa pedidu dezisténcia keixa	Artigu 216 KPP	1
Totál		13

3. Total kazu sira ne'ebé kontinua prosesu tuir JSMP nia monitorizasaun : 0

4. Totál kazu sira ne'ebé adia tuir JSMP nia monitorizasaun: 0

B. Deskrisaun sumáriu julgamentu ba desizaun kazu sira

1. Krime ofensa ba integridade fízika simples ho natureza violénsia doméstika

Nú. Prosesu : 0065/21.OEPMK
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Calisto Tout
Desizaun : Pena admoestasaun

Iha 21 Janeiro 2022, Tribunál Distritál Oekusi prezide julgamentu leitura sentensa ba kazu krime ofensa ba integridade fízika simples ho natureza violénsia doméstika (VD) ne'ebé envolve arguidu DI hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 10 Jullu 2021, maizumenus iha oras tuku 10:00 dadeer, arguidu tebe dala ida iha lezada nia kanotak parte loos rezulta moras no bubu. Antes agresaun ne'e, arguidu ho lezada diskute malu kona-ba arguidu la aseita lezada ba partisipa serimonia prenda iha sira nia bairo. Kazu ne'e aneksu hamutuk ho relatóriu médiku husi Ospítal Referal Oekusi no fotografia sira kona-ba violénsia husi polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende nia hahalok. Arguidu mós deklara katak depoisde akontesimentu ne'e sira dame malu to'o agora. Liután arguidu deklara katak nia serbisu hanesan to'os-na'in no laiha rendimentu fixu kada fulan. Arguidu mós foin primeiravés mai hatan iha tribunál no promete sei la repete hikas hahalok ne'e hasoru lezada ka ema seluk iha futuru.

Prokuradór husu ba tribunál atu presinde tiha lezada nia deklarasaun tanba arguidu konfesa faktu sira totalmente. Parte defeza laiha opsaun ba prokuradór nia pedidu ne'e. Ho nune'e, tribunál presinde tiha lezada nia deklarasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian, nune'e atu prevene krime hanesan akontese tan iha futuru, husu tribunál atu aplika pena ne'ebé hakerek ona iha artigu 145 KP.

Enkuantu defeza husu ba tribunál atu fó pena ne'ebé kmaan ba arguidu ho konsiderasaun sira katak arguidu konfesa, arrepende ninia hahalok, di'ak malu ona ho lezada, foin primeiravés mai hatan iha tribunál no promete sei la repete tan hahalok hanesan iha futuro.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kanotak parte loos. Tribunál konsidera arguidu ninia hahalok hanesan dolu direitu tanba ho hakarak rasik tebe nia feen iha kanotak ho intensaun atu halo lezada sofre moras.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada, foin primeiravés mai hatan iha tribunál no promete sei la repete tan krime hanesan iha futuro, nune'e tribunál konklui prosesu ne'e no kondena arguidu ho pena admoestasaun.

2. Krime ofensa ba integridade fízika simples

Nú. Prosesu : 0001/20.OEBCN
Kompozisaun Tribunál : Singulár
Juis : Dr. Yudi Pamunkas
Prokuradór : Dr. Pedro Babtista Aleixo dos Santos
Defeza : Dr. Marcelino Marques Coro
Desizaun : Omologa dezisténsia keixa

Iha 21 Janeiro 2022, Tribunál Distritál Oekusi prezide julgamentu tentativa konsiliaun ba kazu krime ofensa ba integridade fízika simples ne'ebé envolve arguidu Abilio Seno Colo hasoru lezadu Deonizio Ximenes Obe no Carlito Sipa, iha Aldeia Baonana, Suku Beneufe, Sub-distritu Nitibe, Distritu Oekusi.

Akuzasaun Prokuradór

Prokuradór akuza katak iha 08 Janeiro 2020, iha oras tuku 12:00 meiodia, arguidu no lezadu diskute malu tanba arguidu bandu lezadu sira faan sasan iha Merkadu Baocnana. Ho nune'e, arguidu buti lezadu Carlito nia kakorok rezulta mean no moras. Arguidu mós tebe dala rua iha lezadu Deonizio nia kelen parte loos no tuku dala rua iha nia tilun-hun parte karuk halo lezadu monu ba rai, desmaia no sofre moras. Kazu ne'e aneksa hamutuk ho relatóriu médiku husi Sentru Saúde Baocnana no fotografia sira kona-ba violénsia ne'e husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu sira.

Iha prosesu konsiliaun ne'e, lezadu sira hakarak dame malu ho arguidu ho kondisaun katak arguidu tenke fó indemnizasaun sivíl ho montante US\$150.00 ba lezadu na'in rua. Lezadu sira mós husu arguidu atu la repete ninia hahalok ne'e hasoru lezadu sira iha futuru. Arguidu konkorda ho lezadu sira nia pedidu ne'e no deklara katak arrepende ninia hahalok no promete sei la repete tan hahalok hanesan iha futuru. Tanba arguidu simu pedidu ne'e, nune'e lezadu sira husu ba tribunál atu deziste tiha sira ninia-keixa hasoru arguidu.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu sira, nune'e tribunál konklui prosesu ne'e no omologa akordu ne'e ho kondisaun arguidu sei fó indemnizasaun sivíl ba lezadu na'in rua ho valor osan US\$150.00.

3. Krime ofensa ba integridade fízika simples ho natureza violénsia doméstika

Nú. Prosesu	: 0048/21.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Mateus Nesi
Defeza	: Dr. Marcelino Marques Coro
Desizaun	: Pena prizaun tinan 1 suspende ba tinan 1

Iha 24 Janeiro 2022, Tribunál Distritál Oekusi prezide julgamentu leitura sentensa ba kazu krime ofensa ba integridade fízika simples ho natureza violénsia doméstika ne'ebé envolve arguidu CL hasoru nia feen AF, iha Distritu Oekusi.

Akuzasaun Prokuradór

Prokuradór akuza katak iha 07 Maiu 2021, maizumenus iha oras tuku 19:00 kalan, arguidu basa dala ida iha lezada nia hasan parte karuk no basa dala ida iha lezada nia hasan parte loos. Arguidu mos rakut dala ida iha lezada nia hasan parte karuk no continua tebe dala ida iha lezada nia kanotak. Antes agresaun ne'e, arguidu ho lezada

diskute malu kona-ba lezada husu osan ba arguidu atu ba partisipa iha serimonia kultura husi parte lezada nian. Kazu ne'e aneksu hamutuk ho relatóriu médiku husi PRADET no fotografia sira husi polísia-VPU kona-ba violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene hahalok hanesan ne'e ladi'ak no bele prejudika lezada nia saude fízika. Arguidu mós deklarara katak arrepende ninia hahalok no promete sei la repete hikas hahalok hirak ne'e hasoru nia feen ka ema seluk iha futuru. Arguidu hatutan katak depoisde akontesimentu liutiha loron tolu arguidu husu deskulpa no dame malu kedas ho lezada, hola malu ho lezada iha tinan 1990, iha oan na'in haat, serbisu hanesan seguransa sivil ho rendimentu kada fulan US\$180.00 no foin primeiravés mai hatan iha tribunál.

Alende ne'e, lezada kontinua konfirma faktu hotu iha akuzasaun no konfirma mós ho arguidu nia deklarasaun katak depoisde akontesimentu ne'e liutiha loron tolu arguidu husu fali deskulpa ba lezada no sira di'ak malu kedas.

Alegasaun finál

Prokuradór intende katak arguidu komete hahalok ne'e ho livre, deliberada no konsientemente, hodi hamoras lezada nia saúde fízika atraves husi meu sira hanesan deskreve ona iha akuzasaun. Tanba ne'e, atu prevene arguidu repete ninia hahalok ne'e iha futuru, husu ba tribunál atu aplika pena ne'ebé hakerek ona iha artigu 145 KP.

Entretantu defeza haktuir katak depoisde akontesimentu liutiha loron tolu arguidu husu deskulpa ba lezada no sira dame malu ona to'o agora no arguidu mós la komete tan krime seluk hasoru lezada. Arguidu arrepende nia hahalok, kolabora di'ak ho tribunál, oan na'in haat, no promete sei la repete hahalok hanesan iha futuru. Tanba ne'e, husu ba tribunál atu aplika pena ne'ebé kmaan ba arguidu.

Desizaun

Depoisde avalia ba faktu hotu, tribunál prova katak arguidu basa dala ida iha lezada nia hasan perte karuk no basa dala ida iha lezada nia hasan parte loos. Alende ne'e, arguidu rakut dala ida iha lezada nia hasan parte karuk no tebe dala ida iha lezada nia kanotak.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada

no promete sei la repete hahalok hanesan iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

4. Krime ofensa ba integridade física simples ho natureza violéncia doméstika

Nú. Prosesu : 0032/21.OEPMK
Kompozisaun Tribunál : Singulár
Juis : Dr. Yudi Pamunkas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 24 Janeiro 2022, Tribunál Distritál Oekusi prezide julgamentu leitura sentensa ba kazu krime ofensa ba integridade física simples ho natureza VD ne'ebé envolve arguidu JP hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 30 Abril 2021, iha oras tuku 16:00 lokraik, derrepente arguidu buti metin lezada nia liman. Lezada husu atu arguidu husik nia liman, atu nune'e lezada bele kontinua fase roupa maibé arguidu la husik. Tanba ne'e, lezada tata arguidu nia liman nu'udar meu lejítima defeza hafoin arguidu husik lezada nia liman. Depoisde husik liman, arguidu basa ho maka'as iha lezada nia hasan parte loos rezulta moras. Kazu ne'e aneksa hamutuk ho relatóriu médiku husi PRADET no fotografia sira husi polísia – VPU kona-ba violéncia ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no rekoñese katak hahalok hanesan ne'e ladi'ak no bele prejudika lezada sofre moras. Arguidu mós deklara katak depoisde akontesimentu, arguidu no lezada dame malu kedas to'o agora. Arguidu haktuir tan katak serbisu hanesan mekánika motor ho rendimentu kada fulan US\$145.00, foin primeiravés mai hatan iha tribunál no promete sei la repete ninia hahalok hirak ne'e hasoru lezada ka ema seluk iha futuru.

Lezada la fó nia deklarasaun tanba prokuradór konsidera prova sira suficiente ona no husu ba tribunál atu presinde lezada nia deklarasaun. Parte defeza konkorda ho prokuradór ninia pedidu ne'e. Ho nune'e, tribunál presinde lezada nia deklarasaun.

Alegasaun finál

Prokuradór haktuir katak arguidu komete hahalok ne'e ho livre no preense elementu krime ofensa ba integridade fízika simples ho natureza VD. Prokuradór reforsa liután katak kada loron tribunál sempre iha julgamentu ba kazu sira ho natureza VD, nune'e atu prevene krime hanesan akontese tan iha futuro, husu ba tribunál atu aplika pena ne'ebé hakerek ona iha artigu 145 KP.

Enkuantu defeza husu ba tribunál atu aplika pena ne'ebé adekuadu ho konsiderasaun sira katak depoisde akontesimentu, arguidu ho lezada dame malu kedas no kontinua moris hamutuk. Arguidu mós promete sei la repete hahalok ne'e hasoru lezada iha future, foin primeiravés mai hatan iha tribunál no arguidu mak iha responsabilidade másimu ba nia família.

Desizaun

Depoisde avalia faktu sira hotu, tribunál prova katak arguidu buti metin lezada nia liman, lezada husu atu arguidu husik lezada nia liman, nune'e lezada bele kontinua fase roupa maibé arguidu la husik. Tanba ne'e lezada tata arguidu nia liman nu'udar meu lejítima defeza foin arguidu husik lezada nia liman. Tribunál mós prova katak depoisde arguidu husik nia liman, arguidu basa ho maka'as iha lezada nia hasan parte loos.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada, foin primeiravés mai hatan iha tribunál, responsável ba família no promete sei la repete tan hahalok hanesan hasoru lezada iha futuro, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

5. Krime ofensa ba integridade fízika simples ho natureza violénsia doméstika

Nú. Prosesu	: 0023/21.OEPMK
Kompozisaun Tribunál	: Singulár
Juis	: Dr. Yudi Pamunkas
Prokuradór	: Dr. Mateus Nesi
Defeza	: Dr. Marcelino Marques Coro
Desizaun	: Pena prizaun tinan 3 suspende ba tinan 3

Iha 24 Janeiro 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu DF hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 16 Marsu 2021, iha oras tuku 08:00 dadeer, arguidu basa dala ida iha lezada nia matan parte karuk rezulta moras. Antes agresaun ne'e, arguidu ho lezada diskute malu kona-ba lezada seidauk tein etu tanba foos hotu. Kazu ne'e aneksa hamutuk ho relatóriu médiku husi PRADET no fotografia husi polisia-VPU kona-ba violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ninia hahalok, di'ak malu ona ho lezada no promete sei la komete tan krime hanesan iha futuru.

Prokuradór husu ba tribunál atu presinde lezada nia deklarasaun tanba prova sira suficiente no parte defeza konkorda ho prokuradór ninia pedidu ne'e. Tribunál simu pedidu ne'e no presinde lezada nia deklarasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian, nune'e atu prevene arguidu repete tan hahalok hanesan iha futuru, husu ba tribunál atu kondena arguidu ho pena prizaun tinan ida suspende ba tinan rua.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun sira katak arguidu konfesa, arrepende ninia hahalok, di'ak malu ona ho lezada no promete sei la komete tan krime hanesan iha futuru.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia matan parte karuk. Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

6. Krime ofensa ba integridade fízika simples ho natureza violénsia doméstika

Nú. Prosesu : 0016/20.OEBCN

Kompozisaun Tribunál : Singulár

Juis : Dr. Yudi Pamunkas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1

Iha 24 Janeiro 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguida MT hasoru nia la'en, iha Distritu Oekusi.

Akuzasaun Prokuradór

Prokuradór akuza katak iha 10 Maiu 2020, iha oras tuku 18:00 lokraik, arguida lori ai-kabelak ida baku dala ida iha lezadu nia reen-toos rezulta kanek ki'ik, bubu no moras. Antes agresaun ne'e, arguida ho lezadu diskute malu kona-ba lezadu foti hahan ne'ebé arguida tein no lori ba han hamutuk tiha ho lezadu nia maluk sira. Kazu ne'e aneksa hamutuk ho relatóriu médiku husi Sentru Saúde Baocnana no fotografia sira husi polísia-VPU kona-ba violénsia ne'e.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no arrepende ninia hahalok ne'e. Arguidu mós foin primeiravés mai hatan iha tribunál no di'ak malu ona ho lezada.

Tanba arguidu konfesa totalmente no prova suficiente nune'e prokuradór husu ba tribunál atu presinde lezada nia deklarasaun. Pedidu ne'e, hetan konkordánsia mós husi parte defeza. Tanba ne'e, bazeia ba pedidu refere, tribunál presinde lezada nia deklarasaun.

Alegasaun finál

Prokuradór haktuir katak arguidu ninia aktu ne'e preense rekezitu sira husi krime ofensa ba integridade fízika simples, nune'e atu prevene arguidu repete tan ninia hahalok hanesan iha futuro, husu ba tribunál atu kondena arguidu tuir artigu 145 KP.

Defeza husu ba tribunál atu konsidera mós sirkunstánsia atenuante sira hanesan, arguidu konfesa faktu sira, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e husu ba tribunál atu kondena arguidu ho pena ne'ebé kmaan.

Desizaun

Depoisde avalia faktu sira hotu, tribunál prova katak arguida lori ai-kabelak ida baku dala ida iha lezadu nia reen-toos. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa faktu sira totalmente, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

7. Krime ofensa ba integridade fízika simples ho natureza violénsia doméstika

Nú. Prosesu : 0034/21.OESIC
Kompozisaun Tribunál : Singulár
Juis : Dr. Yudi Pamunkas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1 fulan 6

Iha 24 Janeiro 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu JA hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 16 Abril 2021, maizumenus iha oras tuku 16:00 lokraik, arguidu ho kondisaun lanu lori ai-sanak ida baku dala haat iha lezada nia kotuk laran no tuku dala rua iha lezada nia kotuk parte karuk. Lezada atu halai ses husi arguidu, maibé arguidu dada lezada nia lipa to'o nakles no kontinua tuku dala rua iha lezada nia tilun-hun parte loos no buti dala ida iha lezada nia kakorok. Antes agresaun ne'e, arguidu ho lezada diskute malu kona-ba arguidu haruka lezada atu prepara hahan ba arguidu, maibé lezada hatan sei habai hela haree no batar nune'e mosu agresaun hirak ne'e. Kazu ne'e aneksu hamutuk ho relatóriu médiku husi Ospital Referál Oekusi no fotografia husi polísia-VPU kona-ba violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu deklara parsialmente katak basa de'it dala rua iha lezada nia tilun-hun parte loos, la'os tuku lezada nia tilun-hun. Kona-ba faktu sira seluk, arguidu deklara katak la halo. Mezmu nune'e, arrepende ninia hahalok, di'ak malu ona ho

lezada no kontinua moris hamutuk, iha oan na'in lima, serbisu hanesan to'os-na'in nune'e laiha rendimentu fixu kada fulan, foin primeiravés mai hatan iha tribunál no promete sei la repete tan hahalok hanesan iha futuru.

Enkuantu lezada kontinua konfirma faktu hotu iha akuzasaun no deklarata katak di'ak malu ona ho arguidu. Lezada mós hatutan katak depoisde akontesimentu ne'e arguidu la hemu ona tua.

Alegasaun finál

Prokuradór konsidera faktu hotu provadu bazeia ba deklarasaun lezada nian. Tanba ne'e, mezmua arguidu nega faktu balun iha akuzasaun, prokuradór konsidera hahalok arguidu nian ne'e prene duni elementu krime ofensa ba integridade física simples. Bazeia ba konsiderasaun ne'e no atu prevene krime hanesan akontese tan iha futuru, husu ba tribunál atu aplika pena ne'ebé hakerek ona iha artigu 145 KP.

Enkuantu defeza husu ba tribunál atu fó pena ne'ebé kmaan ba arguidu ho konsiderasaun sira katak arguidu deklarata de'it faktu ne'ebé nia komete, arrepende ona ninia hahalok, di'ak malu ona ho lezada no promete sei la komete tan krime hanesan iha futuru.

Desizaun

Depoisde avalia faktu sira hotu, tribunál prova katak arguidu ho kondisaun lanu lori aisanak ida baka dala haat iha lezada nia kotuk laran no tuku dala rua iha lezada nia kotuk parte karuk. Tribunál mós prova katak arguidu dada lezada nia lipa to'o nakles bainhira lezada atu halai ses husi arguidu. Arguidu mós tuku dala rua iha lezada nia tilun-hun parte loos no buti dala ida iha lezada nia kakorok.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu arrepende ninia hahalok, di'ak malu ona ho lezada no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

8. Krime ofensa ba integridade física simples ho natureza violénsia doméstika

Nú. Prosesu	: 0089/21.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena admoestasaun

Iha 26 Janeiro 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu AAO hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 09 Setembru 2021, maizumenus iha oras tuku 22:00 kalan, arguidu ho kondisaun lanu tebe dala ida iha lezada nia kanotak parte karuk rezulta bubu no moras. Kazu ne'e aneksu hamutuk ho relatóriu médiku husi PRADET no fotografia husi polísia-VPU kona-ba aktu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene katak bainhira tebe ema seluk nia isin bele halo ema refere sofre moras. Arguidu mós deklara katak arrepende ninia hahalok ne'e no promote sei la repere iha futuru tantu hasoru nia feen ka ema seluk. Arguidu hatutan katak iha oan na'in neen, dame malu ona ho lezada to'o agora, serbisu hanesan to'os-na'in nune'e laiha rendimentu fixu kada fulan no foin primeiravés mai hatan iha tribunál.

Enkuantu lezada kontinua konfirma faktu hotu iha akuzasaun no haktuir katak desde hola malu arguidu foin primeiravés komete krime hasoru lezada. Lezada mós deklara katak di'ak malu ona ho arguidu no arguidu para ona hemu tua.

Alegasaun finál

Prokuradór intende katak faktu ne'ebé hakerek ona iha akuzasaun ne'e loos hotu bazeia ba deklarasaun husi arguidu rasik ne'ebé konfesa faktu integralmente. Prokuradór konsidera hahalok arguidu ne'e preense duni elementu krime ofensa ba integridade fízika simples, nune'e husu ba tribunál atu aplika pena ne'ebé hakerek ona iha artigu 145 KP.

Enkuantu defeza husu ba tribunál atu fó desizaun ne'ebé adekua ba arguidu ho konsiderasaun katak arguidu konfesa, arrepende ninia hahalok, iha oan na'in neen no dame malu ona. Arguidu mós hanesan to'os-na'in nune'e laiha rendimentu fixu kada fulan, foin primeiravés mai tribunál no promete sei la repete hikas hahalok hirak ne'e hasoru nia feen ka ema seluk iha futuru. Arguidu mós iha responsabilidade másimu ba iha nia família.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kanotak. Bazeia ba faktu prova hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena admoestasaun.

9. Krime ofensa ba integridade fízika simples ho natureza violénsia doméstika

Nú. Prosesu : 0078/21.OEPMK
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 1 fulan 3 suspende ba tinan 2

Iha 27 Janeiro 2022, Tribunál Distritál Oekusi prezide julgamentu leitura sentensa ba kazu krime ofensa ba integridade fízika simples ho natureza VD ne'ebé envolve arguidu CNT hasoru nia feen MFS no nia oan JLT, iha Distritu Oekusi.

Akuzasaun Prokuradór

Prokuradór akuza katak iha 15 Agostu 2021, maizumenus iha oras tuku 19:30 kalan, arguidu basa dala rua iha lezada MFS nia ulun rezulta moras. Arguidu kontinua lori ai-sukaer sanak ida baku dala ida iha lezada MFS nia kelen parte loos kauza bubu, metan no moras. Arguidu mós basa dala ida iha lezadu JLT nia tilun-hun parte loos kauza moras no halo lezada monu kedas ba iha rai. Antes agresaun ne'e, arguidu ho lezada MFS diskute malu kona-ba lezada haruka arguidu atu ba sosa fós iha merkadu maibé arguidu lakohi ho nune'e mosu agresaun hirak ne'e. Kazu ne'e aneksu hamutuk ho relatóriu médiku husi PRADET no fotografia sira kona-ba violénsia husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a, c), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende. Arguidu mós deklara katak liutiha loron tolu husi akontesimentu, arguidu ho lezada sira dame malu kedas no to'o agora laiha tan ona problema seluk. Arguidu salienta liután katak hola malu ho lezada iha tinan 2008, iha oan na'in haat, serbisu hanesan to'os-na'in nune'e laiha rendimentu fixu kada fulan, foin primeiravés mai hatan iha tribunál no promete sei la repete hahalok hanesan hasoru nia feen ho nia oan no ema seluk iha futuro.

Alende ne'e, lezada MFS mós kontinua konfirma faktu hotu iha akuzasaun no konfirma ho arguidu nia deklarasaun katak depoisde akontesimentu ne'e liutiha loron tolu sira di'ak malu kedas no to'o agora arguidu la komete tan krime seluk hasoru lezada.

Tanba prova suficiente ona nune'e prokurador husu ba tribunál atu presinde lezadu JLT nia deklarasaun. Parte defeza mós konkorda ho pedidu ne'e. Tribunál bazeia ba pedidu ne'e, presinde lezada nia deklarasaun.

Alegasaun finál

Prokurador haktuir katak iha produsaun ba prova arguidu konfesa faktu hotu iha akuzasaun no konfirma mós husi lezada MFS tanba ne'e konsidera arguidu ninia hahalok prenze duni elementu krime ofensa ba integridade fízika simples. Alende ne'e, krime violénsia doméstika barak liu akontese iha Regiaun Oekusi kompara ho munisípiu sira seluk, nune'e atu iha prevensaun ba futuru arguidu la repete ninia hahalok ne'e, husu ba tribunál atu aplika pena ne'ebé hakerek ona iha artigu 145 KP.

Enkuantu defeza haktuir katak nu'udar família sei la sees husi sala no arguidu mós rekoñese katak ninia hahalok hasoru nia feen ho nia oan ne'e ladi'ak. Alende ne'e, arguidu konfesa faktu hotu iha akuzasaun, arrepende ninia hahalok, kolabora di'ak ho tribunál, dame malu ona, iha oan na'in haat, serbisu hanesan to'os-na'in nune'e laiha rendimentu fixu kada fulan. Arguidu mós promete katak sei la repete hahalok hanesan iha futuru. Tanba ne'e husu ba tribunál atu aplika pena ne'ebé justu ba aruidu.

Desizaun

Depoisde avalia faktu sira hotu, tribunál prova katak arguidu basa dala rua iha lezada MFS nia ulun no lori ai-sukaer sanak ida baku dala ida iha lezada MFS nia kelen parte loos. Tribunál mós prova katak arguidu basa dala ida iha lezadu JLT nia tilun-hun parte loos to'o lezada monu ba iha rai.

Bazeia ba faktu provadu hirak ne'e no tetu mós ba sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no lezadu no promete sei la repete tan krime hanesan iha futuru, nune'e tribunál konklui prosesu ne'e no kondena arguidu ho pena prizaun tinan ida fulan tolu suspende ba tinan rua.

10. Krime ofensa ba integridade fízika simples ho natureza violénsia doméstika

Nú. Prosesu	: 0061/21.OESIC
Kompozisaun Tribunál	: Singulár
Juis	: Dr. Yudi Pamukas
Prokurador	: Dr. Pedro Baptista Aleixo dos Santos
Defeza	: Dr. Marcelino Marques Coro

Desizaun

: Pena prizaun tinan 1 suspende ba tinan 1

Iha 27 Janeiro 2022, Tribunál Distritál Oekusi prezide julgamentu leitura sentensa krime ofensa ba integridade fízika simples ho natureza VD ne'ebé envolve arguidu XQ hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 16 Juñu 2021, maizumenus iha oras tuku 19:00 kalan, arguidu tebe dala ida iha lezada nia kanotak parte loos rezulta moras. Antes agresaun ne'e, arguidu ho lezada diskute malu kona-ba lezada haruka arguidu ba ajuda família sira halo sira ninia dapur, maibé arguidu lakohi. Kazu ne'e aneksu hamutuk ho relatóriu médiku husi Ospital Referál Oekusi no fotografia sira kona-ba violénsia ne'e hasai husi polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós deklarata katak depoisde akontesimentu, arguidu husu ona deskulpa ba lezada no to'o agora laiha ona problema. Arguidu haktuir tan katak arguidu ho lezada hola malu hanesan feen ho la'en iha tinan 2016, iha oan na'in rua, serbisu hanesan to'os-na'in nune'e laiha rendimentu fixu kada fulan, foin primeiravés mai hatan iha tribunál no promete sei la repete hahalok hirak ne'e hasoru nia feen ka ema seluk iha futuro.

Alende ne'e, lezada mós kontinua konfirma faktu hotu iha akuzasaun no deklarata mós katak depoisde akontesimentu ne'e arguidu husu kedas deskulpa ba lezada no sira diak malu kedas.

Alegasaun finál

Prokuradór haktuir katak arguidu komete hahalok ne'e ho livre, deliberada no konsientemente, hodi hamoras lezada nia fízika atraves husi meu sira ne'ebé deskreve ona iha akuzasaun. Tanba ne'e, konsidera arguidu ninia hahalok provadu no preense duni elementu krime ofensa ba integridade fízika simples. Atu bele iha prevensaun jerál iha future, husu ba tribunál atu aplika pena prizaun fulan neen suspende ba tinan ida.

Enkuantu defeza husu ba tribunál atu kondena arguidu ho pena ne'ebé adekua ho konsiderasaun sira katak arguidu konfesa, arrepende ninia hahalok, husu ona deskulpa ba lezada no di'ak malu kedas ho lezada.

Desizaun

Depoisde avalia faktu sira hotu, tribunál prova katak arguidu tebe dala ida iha lezada nia kanotak parte loos rezulta lezada sofre moras. Bazeia ba faktu provadu hirak ne'e no tetu mós ba sirkunstánsia atenuante sira hanesan arguidu konfesa, arrepende ninia hahalok, husu ona diskulpa no di'ak malu ona ho lezada, ho nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

11. Krime ofensa ba integridade fízika simples ho natureza violénsia doméstika

Nú. Prosesu : 0003/21.OEBCN
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena prizaun tinan 1 fulan 9 suspende ba tinan 2

Iha 28 Janeiro 2022, Tribunál Distritál Oekusi prezide julgamentu leitura sentensa ba kazu ofensa ba integridade fízika simples ho natureza VD ne'ebé envolve arguidu CAF hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 25 Marsu 2021, maizumenus iha oras tuku 18:00 lokraik, mosu dezentendmentu entre lezada ho arguidu nia subriña, ho nune'e arguidu basa dala barak iha lezada nia tilun-hun parte loos ho ulun no tebe dala ida iha lezada nia kotuk laran rezulta moras. Arguidu mós tuda lezada ho nu'u maran fuan lima ne'ebé ben sei iha laran no kona iha lezada nia kelen no ain rezulta moras. Kazu ne'e aneksu hamutuk ho relatóriu médiku husi Sentru Saúde Baocnana no fotografia sira hasai husi polísia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu deklara katak faktu seluk loos hotu, maibé faktu kona-ba tebe lezada nia kotuk laran, la loos. Arguidu mós deklara katak arrepende ninia hahalok ne'e, mezmú nune'e depoisde akontesimentu ne'e lezada ho arguidu hela separadu to'o agora. Oan na'in tolu hela ho lezada no oan na'in tolu seluk hela ho arguidu nia inan/aman. Liután arguidu haktuir katak foin primeiravés mai hatan iha tribunál desde hola lezada nu'udar nia iha 2008, serbisu hanesan to'os-na'in nune'e laiha rendimentu

fixu kada fulan. Arguidu mós promote sei la repete ninia hahalok ne'e hasoru nia feen ka ema seluk iha futuru. Arguidu sei hadomi lezada no hakarak moris hamutuk nafatin hanesan feen ho laen.

Entretantu lezada kontinua konfirma faktu hotu iha akuzasaun no deklarata katak antes ne'e arguidu sempre baku lezada maibé lezada nunca keixa iha polisia. Lezada mós konfirma katak sira iha oan na'in neen no oan na'in tolu hela ho lezada no oan na'in tolu hela ho arguidu nia inan/aman. Lezada hatutan katak lakohi ona atu moris hamutuk ho arguidu tanba ta'uk arguidu repete ninia hahalok.

Alegasaun finál

Prokuradór haktuir katak mezmú arguidu koko atu nega faktu balu maibé lezada konfirma ho akuzasaun no lezada mós deklarata katak seidak di'ak malu ho arguidu no lakohi atu moris hamutuk ona ho arguidu tanba ta'uk arguidu repete ninia hahalok. Ida ne'e hatudu katak arguidu ema ne'ebé gosta rezolve problema ho violénsia. Nune'e atu prevene arguidu repete ninia hahalok ne'e iha futuru, husu ba tribunál atu kondena arguidu ho pena prizaun tinan ida.

Entretantu defeza haktuir katak arguidu kolabora ho tribunál, arrepende ninia hahalok, hakarak atu moris hamutuk nafatin ho lezada, promete sei la repete ninia hahalok ne'e iha futuru, serbisu hanesan to'os-na'in nune'e laiha rendimentu fixu kada fulan. Ho sirkunstánsia sira ne'e hotu, husu ba tribunál atu kondena arguidu ho pena ne'ebé justu.

Desizaun

Depoisde avalia faktu sira hotu, tribunál prova katak arguidu basa dala barak iha lezada nia tilun-hun parte loos ho ulun no tebe dala ida iha lezada nia kotuk laran. Tribunál mós prova katak arguidu tuda lezada ho nu'u fuan lima ne'ebé ben sei iha laran no kona iha lezada nia kelen.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu kolabora ho tribunál, arrepende ninia hahalok no promete sei la repete ninia hahalok ne'e iha futuru, ho nune'e tribunál konklui prosesu ne'e no kondena arguidu ho pena prizaun tinan ida fulan sia suspende ba tinan rua.

12. Krime ofensa ba integridade fízika simples ho natureza violénsia doméstika

Nú. Prosesu	: 0063/21.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Mateus Nesi
Defeza	: Dr. Calisto Tout

Desizaun

: Pena prizaun tinan 1 suspende ba tinan 1

Iha 31 Janeiro 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu PS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 21 Juñu 2021, maizumenus iha oras tuku 21:00 kalan, arguidu ho kondisaun lanu diskute malu ho lezada no basa dala ida iha lezada nia kanuruk rezulta moras. Arguidu mós tebe dala ida iha lezada nia oin rezulta moras. Kazu ne'e aneksu hamutuk ho relatóriu médiku husi PRADET no fotografia sira kona-ba aktu violénsia ne'e husi polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ninia hahalok ne'e. Alende ne'e, arguidu mós deklara katak depoisde akontesimentu arguidu ho lezada dame malu kedas no di'ak malu to'o agora. Arguidu haktuir katak iha oan na'in rua, serbisu hanesan to'os-na'in nune'e laiha rendimentu fixu kada fulan, foin primeiravés mai hatan iha tribunál no promete sei la repete ninia hahalok hanesan hasoru lezada ka ema seluk.

Alende ne'e, lezada continua konfirma faktu hotu iha akuzasaun no deklara mós katak depoisde akontesimentu sira di'ak malu to'o agora. Lezada hatutan katak desde hola malu arguidu foin primeiravés basa no tebe lezada.

Alegasaun finál

Prokuradór haktuir katak iha produsaun ba prova arguidu konfesa faktu hotu iha akuzasaun no hahalok ne'e preense elementu krime ofensa ba integridade fízika simples. Alende ne'e, krime violénsia doméstika barak liu akontese iha Regiaun Oekusi kompara ho munisípiu sira seluk. Tanba ne'e, atu halo prevensaun jerál iha futuro, husu ba tribunál atu aplika pena ne'ebé hakerek ona iha artigu 145 KP.

Enkuantu defeza haktuir katak arguidu kolabora di'ak ho tribunál, konfesa faktu integralmente, arrepende ninia hahalok, depoisde akontesimentu ne'e di'ak malu kedas ho lezada no to'o agora mós laiha tan problema ho lezada, nune'e husu ba tribunál atu kondena arguidu ho pena ne'ebé adekuadu.

Desizaun

Depoisde avalia faktu sira hotu, tribunál prova katak arguidu ho kondisaun lanu diskute malu ho lezada no basa dala ida iha lezada nia kanuruk. Tribunâl mós prova katak arguidu tebe dala ida iha lezada nia oin.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no promete sei la repete ninia hahalok hanesan hasoru lezada ka ema seluk, ho nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

13. Krime ofensa ba integridade fízika simples ho natureza violénsia doméstika

Nú. Prosesu : 0052/21.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Pena prizaun tinan 1 suspende ba tinan 1

Iha 31 Janeiro 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu MC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 12 Juñu 2021, maizumenus iha oras tuku 11:00 dadeer, arguidu buti dala ida iha lezada nia kakorok no hit lezada riba ba saku ne'ebé tau hela batar. Aktu sira ne'e rezulta lezada sofre moras no bubu. Antes agresaun ne'e, arguidu ho lezada diskute malu kona-ba arguidu husu osan sentavus 0,25 ba lezada atu hola sigaru maibé lezada la fo. Kazu ne'e aneksu hamutuk ho relatóriu médiku husi PRADET no fotografia sira kona-ba aktu violénsia ne'e husi polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara arrepende ninia hahalok. Arguidu mós deklara katak dame malu ona ho lezada no to'o agora laiha tan problema ho lezada. Arguidu haktuir liután katak iha oan na'in rua, serbisu hanesan natar na'in nune'e laiha rendimentu fixu kada fulan, foin primeiravés mai hatan iha

tribunál no promote sei la repete hikas hahalok hirak ne'e hasoru nia feen ka ema seluk iha futuru.

Alende ne'e, lezada mós continua konfirma faktu hotu iha akuzasaun no konfirma mós ho arguidu ninia deklarasaun katak depoisde akontesimentu ne'e di'ak malu kedas ho lezada to'o agora.

Alegasaun finál

Prokuradór intende katak arguidu halo hahalok ne'e ho livre, deliberada no konsientemente. Nune'e konkretiza apenas atu hamoras lezada nia saude fízika atraves husi meu sira hanesan deskreve ona iha akuzasaun. Tanba ne'e, laiha dúvida ba faktu sira ne'ebé hakerek ona iha akuzasaun no konsidera hahalok arguidu nian provadu no prenze duni elementu krime ofensa ba integridade fízika simples. Tanba ne'e, prokuradór husu ba tribunál atu aplika pena ne'ebé hakerek ona iha artigu 145 KP.

Entretantu defeza haktuir katak arguidu kolabora di'ak ho tribunál, rekoñese ninia hahalok hasoru nia feen ne'e ladi'ak no arrepende nia hahalok. Alende ne'e, arguidu mós dame malu ona ho lezada, iha oan na'in rua, serbisu hanesan natar na'in, promete katak sei la repete ninia hahalok ne'e iha futuru. Tanba ne'e, solisita ba tribunál atu aplika pena ne'ebé adekuaudu ba arguidu.

Desizaun

Depoisde avalia faktu sira hotu, tribunál prova katak arguidu buti dala ida iha lezada nia kakorok no hit lezada riba ba saku ne'ebé tau hela batar. Bazeia ba faktu provadu hirak ne'e no tetu mós ba sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada, foin primeiravés mai hatan iha tribunál no promete sei la repete hahalok hirak ne'e hasoru lezada ka ema seluk iha futuru, ho nune'e tribunál kondena arguidu ho pena prizaun tinan ida suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl